

Scuvertas unicas en Surses attiran l'attenziun

Avant dus onns han ins chattà en il conturn da la Cavorgia dil Crap Ses artefacts da guerra antics ed in stilet roman rar cun ritgs ornaments. Pervia da quest object ha il Servetsch archeologic dal Grischun ussa lantschà in nov project da perscrutaziun interdisciplinar en questa cuntrada da chats singulara. Quest project cuzza tschintg onns. Alla fin da quest project vul ins preschentar indizis precis davart cumbats eventuels d'avant passa 2000 onns tranter legiunaris romans e Rets indigens en il Surses.

MARTIN GABRIEL/FMR

Il project da perscrutaziun sa numna «CVMBAT», damai «Cumbat». Sco quei ch'il archeolog chantunal Thomas Reitmaier ha ditg a la FMR, cumenzia la lavur da detagl pir uss. «Enfin l'onn 2022 vegnin nus a retschertgar minuziusamain cun spezialists e cun agid da la tecnica l'entir territori tranter Casti e Cunter per segirar tants objects e tantas datas sco pussaivel.» Sco partenaris han ins pudì engaschar la professura Vindonissa a l'Universitad da Basilea, la Gruppa da lavur prospecziun Svizra, l'Uffizi federal da cultura sco er ulteriuras instituziuns. La finamira suenter l'evaluaziun da l'entir project fissi da realisar l'onn 2025 ina exposiziun en Surses.

Stilet roman è object da parada

in stilet roman cun ritgs ornaments è l'object principal da las davosas scuvertas. Sper la spada era il stilet la segunda arma glischa dals schuldads romans, tant dals legiunaris sco er da las truppas auxiliaras. Ses tegn finescha en furma da cruscha, quai che munta ch'il stilet dal Crap Ses po vegnir datà sin la perioda tranter 50 a.C. e la midada dal temp. Stilets da quest tip èn rars. Tenor l'archeolog chantunal Thomas Reitmaier sajan mo quatter tocs enconuschents fin ussa – in da quels derivia dal champ roman Vindonissa en il chantun Argovia. «Il stilet en Surses sa chattava senza taja en il terren ed è forsa vegnì deponì là intenziunadamain.» La restauraziun complexa da quest stgazi è vegnida accompagnada filmicamain. Il process captivant è documentà sco seria da video en trais parts sin il chanal da YouTube dal chantun Grischun.

Anc plirs stgazis giaschan en il terren

L'archeolog chantunal e persvas a basa da las scuvertas dals davos dus onns ch'ì dat anc plirs objects prezios en il territori da project. «In collavuratur scientific en uffizi d'onur ha inspectà sistematicamain il lieu da chat impurtant cun agid d'in detectur da metal per incumbensa dal Servetsch archeologic dal Grischun (SAG). Per in project na basta ina persuna dentant betg», di Reitmaier. Exemplars sco il stilet, vegni ins strusch a chattar pli. Dentant objects cumparegliabels cun ils plumins da fundas, sajettads da las truppas romanas ubain autras armas ed utensils, pudessia quai dar anc plirs. Alla fin finala stoppia l'archeologia survegnir infurmaziuns per reconstruir ils eveniments da avant 2000 onns.



Il stilet roman chattà a Crap Ses è ornà ritgamain cun argient e cun mesch.

FOTO MAD

«Il stilet en Surses sa chattava senza taja en il terren ed è forsa vegnì deponì là intenziunadamain»

Thomas Reitmaier,
archeolog chantunal dal Grischun

Tecnica da scuvrir fitg effizienta

«Probablmain han ins en ils tschientaners passads er gia chattà inqual utensil da cumbat en il territori da la chavorgia dal Crap Ses», ha

l'archeolog chantunal Thomas Reitmaier manegià. «Ins na saveva betg, da tge utensils che quai sa tractava da quest temp e duvrava forsa il metal vegl per luentar e producir auters urdains ubain ch'ins laschava star la tocca.» Da scuvrir metal en il terren saja oz nagin problem cun ils novs detecturs sensibels che chattian prest tut.

Infurmar la publicitad è impurtant

Il lieu da scuverta saja enconuschent, ha il schef dil Servetsch archeologic dal Grischun detg. El na crai betg ch'ìls videos u ils artitgels da pressa animeschan persunas d'ir sez a la tschertga d'objects. Plazzas d'archeologia cun excavaziuns d'utensils prezios dettia quai sin l'entir mund. «Jau sai ch'ins ha empruvà da tegnair en il zuppà las infurmaziuns il cumenzament avant 20 onns. Ina cert ristg da promover in turissem d'interessads è qua. «Jau crai dentant che nus stuain infurmar la publicitad. Ultra da quai vegn il territori enturn la chavorgia dal Crap Ses surveglià bain.»